

Musica populara in otras dimensiuns

Il concert illa baselgia San Lurench a Sent cun Albin Brun e Kristina Brunner ha muossà novas vias illa musica populara. Els han interpretà aignas cumposiziuns cun differents instrumaints.

La Società d'Ütil public da Sent organisescha d'ürant l'on illa baselgia San Lurench a Sent concerts da diversas taimpras musicalas chi sun adüna bain visitats. Audituras ed audituors san cha illa baselgia da Sent vegnan sports concerts d'ota qualità musicala in differents stils. A l'organisatura Leta Mosca reuschischa adüna darcheu d'ingaschar fuormaziuns da musica chi garantischan bunas prestaziuns musicalas. Albin Brun, orgelin da Sviz, sopransax e cumposiziuns e Kristina Brunner, cello ed orgelin da Sviz han muossà chi's po sunar musica populara in differenta maniera. Fin a pacas excepziuns han els sunà il concert a Sent sainza notas, quai chi ha dat l'ocasiun da far improvisaziuns tenor gust. Interessant es eir cha Kristina Brunner suna cun ün orgelin da Svizromatic ed Albin Brunner cun ün diatonic. Las cumposiziuns da Brun sun per part melanconicas e devoziusas



Il duo Brun e Brunner ha concertà eir cun orgelin da Sviz e cun cello.

fotografia: Benedict Stecher

ed algordan ün pa a la musica dal Balcan. Eir la ritmica dals tocs sunats a Sent es statta insolita.

Cumbinaziuns d'instrumaints

Cumanzà ha il concert cun duos orgelins da Sviz següi da tocs cun cello ed orgelin da Sviz. Sco cha Brun ha dit, es stat influenzà ün dals tocs da la Scandi-

navia: «Pro quist toc n'ha eu provà d'integrar ün'atmosfera islandaisa ch'eu sun gnü a cugnuescher pro ün viadi in quel pajais.» Voul dir ch'el haja las uraglias avertas per evenimaints ed episodas specialas ed improva da dar als tocs ün'aigna taimpra. Cun Brun e Brunner s'han chattats duos exponentes da la nouva musica populara da diffe-

rentas generaziuns. D'üna vart Brun chi ha retschevü il «Schweizer Musikpreis 2017» e chi'd es cun differents fuormaziuns sün pals da tuot il muond. Da l'otra vart la musicista giuvna, Kristina Brunner chi dispuona d'üna musicalità sorprendenta e virtuosa. Svlt han badà ils preschaints illa baselgia a Sent badà la paschiun per la

musica e per l'interpretaziun, inspirats da l'atmosfera unica.

Chi sun ils duos musicists?

Kristina Brunner (1993) ha fat il stüdi da cello a la Scoul'ota da musica da Lucerna. Ella ha miss la fundamainta da sia via musicala in famiglia cun seis bap e cun sia sour illa chapella da famiglia. Il stüdi da musica ha ella absolt cun ün «Bachelor of Arts». Actualmaing fa ella il stüdi sül orgelin da Sviz pro divers magisters e magistras da la Scoul'ota da Lucerna. Ella instruischa quel instrumaint a las scoulas da musica da la regiun Gröbental e da la cità da Lucerna. Brunner ha fingià collavurà cun Franz Hohler pro ün concert sül Chastè da Spiez e cun Pedro Lenz al Casinò Theater a Burgdorf. Albin Brun (1959) da Lucerna es ün musicist chi'd es da chasa in diversas spartas da musica, da jazz fin musica populara. El ha stügià musica a l'Academia per musica da scoula e da baselgia a Lucerna ed ha fat il diplom, Scoula da musica I. El s'ha eir scolà sco musicist da jazz a las scoulas da Lucerna, Berna e St.Gallen. Cun aignas fuormaziuns es el in viadi in Svizra e sur cunfins. El ha eir collavurà cun Corin Curschellas e sunà pro'l Festival da Jazz a Willisau. La collavuraziun cun Kristina Brunner es fich intensiva ed il concert ha cumprovà chi s'han chattats duos chi discuorran la listessa lingua musicala. (anr/bcs)